
YAN HA JANNED,

PE AN DIFFERANÇ

ENTRE AN AMOUROUSIEN HAC AR PRIEJOU.

Canomp Amourouset Janned,

Canomp Amourouset Yan :

N'eus nep plac'h qer coant ha Janned,

Na nep potr qer brao ha Yan.

Yan a ra oll vit e Janned,

Ha Janned oll vit he Yan ;

Yan a gar oll gant e Janned,

Janned na gar mann hep Yan.

N'eus nemet chagrina Janned

Evit laqat gouela Yan ;

Evit laqat c'hoarzin Janned,

N'eus nemet arliqa Yan.

Yan a fich ar boued gant Janned,

Janned a vousc'hoarz ous Yan :

Ha qement tra a douch Janned,

Qerqent zo lippet gant Yan.

Gant he dorn propr atao Janned

A garg e veren da Yan ;

Hac atao scudellie Janned

A zo carguet gant he Yan.

Ha pa za da gousqet, Janned ;

E za ive buan Yan :

Yan a gousq tostic d'e Janned,

Ha Janned tostic d'he Yan.

15

Qerqent evel ma sav Janned,
E saill eus e vele, Yan;
Yan a glasq bepred e Janned,
Ha Janned bepret he Yan.

Mar dé bep Mestrez eur Janned,
Ha peb Amourous eur Yan,
Ar vreg zo atao eur Janned,
Hac an ozac'h atao Yan.

Yan a zo pried da Janned;
Janned a zo greg da Yan :
Yan ne anave mui Janned,
Ha Janned a zizanv Yan.

Qement tra' zeu deus a Janned
Zo sur da zisplich da Yan;
Pa velot o c'hoarzin Janned,
E velot sur gouela Yan.

Ar frico a brepar Janned
A ra heugui calon Yan;
Hac ar gūele ma cousq Janned
N'en dé qen mui gūele Yan.

Yan n'ell mui beva gant Janned,
Janned en em varv gant Yan :
Yan gant Doue a garfe Janned,
Janned d'an diaoul a ro Yan.

Au devez ma varvo Janned
A vezo devez caer Yan;
Ha ne velot dansal Janned
Nemet devez maro Yan.

